

شیطان حضرت عیسیٰ کی پہلاٹے نی کوشش کرنا اے

4

¹ فر حضرت عیسیٰ رُوح پاک نال پھرے وے

دریائے اُردن تُوں واپس مُڑی گئے۔ او رُوح پاک

نی ہدایت نال چالی دیہاڑے بیابان وچ رہے، ² جتھے شیطان اُنہاں کی بھٹکاٹے نی کوشش کرنا ریا۔ لگاتار

چالی دیہاڑے تے چالی راتاں بغیر کُجھ کھاٹے نہ

گزارٹے تُوں بعد حضرت عیسیٰ کی سخت پُہکھ

لغی۔ ³ تے شیطان اُنہاں کول آیا تے آخٹ لغا، ”کدے

تُوں اللہ تعالیٰ نا پُتر این، تے اِنہاں بٹیاں کی حکم

کر، تانکہ اے تہاڑے واسطے روٹیاں بٹی جاٹ۔“

⁴ حضرت عیسیٰ جواب دتا، ”کلامِ مُقدس وچ لِخیا اے

کہ اِنسان صِرف روٹی کھاٹے نال ہی نی زندہ رہتا۔“

⁵ فر شیطان، حضرت عیسیٰ کی اِک بھوں اُچے پہاڑ اپر

ہٹی کھڑیا، تے اِک لَمَحے وچ اُنہاں کی دُنیا نیاں ساریاں

بادشاہتاں دَسسیاں، ⁶ تے آخٹ لغا، ”اے سارا کُجھ

میں تُکی ہی دیساں، کیئانکہ اے سب کُجھ مہاڑے

حوالے ہوئی گیا اے تے میں جسی چاہاں دیئی سکنا

اُن۔ 7 کدے تُوں مہاڑے اگے جُھکیں، مہاڑی تعظیم
 کریں، تے اے سارا کُجھ میں تُکی دیئی شوڑساں!“
 8 تے فر حضرت عیسیٰ اُسی آخیا، ”کلامِ پاک وچ
 لِخیا اے کہ ’صِرف ربّ نے اگے سجدہ کرو جیہڑا
 تُساں نا خُدا اے، تے اُسے نی عبادت کرو۔“
 9 فر شیطان اُنہاں کی یروشلیم شہر وچ بڑے عبادت
 خانے نی سب تُوں اُچی جغہ اپر کھڑیا، تے آخٹ
 لغا، ”کدے تُوں اللہ تعالیٰ نا پُتر این، تے اِتھوں تھلے
 چھال مار، 10 کیئانکہ کلامِ پاک وچ اے لِخیا اے،
 ’اللہ تعالیٰ تہاڑی حفاظت کرنے واسطے اپنے فرشتیاں
 کی حُکم گرسی،
 11 تے او تُکی اپنے ہتھاں وچ چائی کینسٹ،
 تانکہ تہاڑے پیراں اپر کُسے بٹے نی وی چوٹ ناں
 لغے۔“
 12 پر حضرت عیسیٰ آخیا، ”کلامِ پاک وچ اے وی لِخیا
 اے کہ ’تُساں ربّ نا امتحان ناں کینوں، جیہڑا تُساں نا
 خُدا اے۔“

13 جیہڑے ویلے شیطان حضرت عیسیٰ کی سارے
طریقیاں نال آزمائی ریا، تے کجھ دیر واسطے اُتھوں
ٹری گیا۔

حضرت عیسیٰ تبلیغ شروع کرنے ان

14 فر حضرت عیسیٰ رُوح پاک نی قدرت نال رنگے وے
ریاست گلیل در واپس ٹری گئے، تے اُتھے سارے علاقے
وچ اُنہاں نی شہرت پھیلی گئی۔ 15 اُتھے حضرت عیسیٰ
بنی اسرائیلی عبادت خانیاں وچ تعلیم دینے ہوئے سن،
تے سارے لوک اُنہاں نی بہوں تعریف کرنے ہوئے سن۔
16 حضرت عیسیٰ ناصرت شہر گئے جتھے اُنہاں نی
پرورش ہوئی سی، تے اپنے رواج نے مطابق اک واری ہفتے
آلے مبارک دیہاڑے او عبادت خانے وچ کلامِ مقدس
نی تلاوت کرنے واسطے کھلتے۔ 17 اُنہاں کی حضرت
یسعیاہ نا صحیفہ دتا گیا۔ اُنہاں صحیفے وچوں او جغہ
کڈی جتھے لِحیا سی، 18 'اللہ تعالیٰ نا رُوح پاک مہاڑے
اپر آے، کیئانکہ اُس مکی خاص طور اپر چُٹیا اے تانکہ

میں غریباں کی خوشی نی خبر سُٹاں۔ اُس مکی پہیجیا
 اے تانکہ قیدیاں کی رہائی نا تے آنہیاں کی بینائی نا پیغام
 سُٹاں۔ مکی اس واسطے وی پہیجیا گیا اے کہ مظلوماں
 کی ظلم تُوں چھڑاں،¹⁹ تے اس گل نی خبر دیاں کہ او ویلا
 آئی گیا اے جدوں اللہ تعالیٰ اپٹے بندیاں اپر فضل کرسی۔
²⁰ فر حضرت عیسیٰ صحیفہ بند کری کے عبادت

خانہ نے خادم کی دیئی شوڑیا، تے اپٹی جغہ
 جائی کے بھی گئے۔ جتنے لوک عبادت خانے وچ
 سن، او سارے انہاں کی حیرت نال تکتن لغے۔

²¹ فر حضرت عیسیٰ آخیا، ”کلام پاک نیاں اے
 گلاں آج تُساں نے سامٹے پوریاں ہوئی گئیاں ان۔“
²² سارے لوکاں اپر انہاں نے پیارے کلام نا بہوں

چنگا اثر ہویا، تے او تعریف کری کے آخٹ
 لغے، ”اے او ہی نی؟ جیہڑا یوسف نا پتر اے۔“

²³ پر حضرت عیسیٰ انہاں کی آخیا، ”مہاڑا خیال
 اے تُساں اے آخٹا چاہئے او، حکیم صاحب!

پہلے اپٹا تے علاج کرو! او مُعجزے ذرا اتھے وی

کری کے دسو نا، جنہاں نے بارے وچ مشہوری
 ہوئی اے کہ تُساں کَفَر نَحُوم شہر وچ کیتے ان! “
 24 حضرت عیسیٰ اپنی گل جاری رخی کے آخیا، ”اے
 گل سچ ہی اے کہ کُسے وی نبی نی اپنے علاقے وچ قدر
 نی ہوئی۔“ 25 فر انہاں آخیا، ”یاد رَحو جس طرح حضرت
 ایلاس نے زمانے وچ جیہڑے ویلے ساڈھے ترے سال تک
 بارش نی ہوئی سی تے سارے مُلخے وچ سخت قحط پیا
 سی، بنی اسرائیل وچ بہوں ساریاں بیوہ عورتاں وی سن۔
 26 پر فر وی اللہ تعالیٰ حضرت ایلاس کی انہاں کول نی
 سی پہیجیا، بلکہ اک غیر بنی اسرائیلی بیوہ عورت کول
 پہیجیا سی جیہڑی ریاست صیدا نے شہر صاریت وچ
 رہی سی۔ 27 اسرح حضرت الیشع نبی نے زمانے وچ بنی
 اسرائیل نے مُلخے وچ وی بہوں لوک کوہڑ نا شکار ہوئے
 وے سن، پر انہاں وچوں کُسے کی وی شفا نی سی لہی،
 صرف شام نے مُلخے نے نَعمان کی شفا لہی سی۔“
 28 اے گلاں سٹی کے عبادت خانے وچ جتنے لوک سن
 انہاں ساریاں کی بہوں غصہ چڑھیا۔ 29 او سارے اٹھے،

تے حضرت عیسیٰ کی شہر تُوں باہر کڈی کے اُس پہاڑ اُپر
 ہٹی گئے جس اُپر اُنہاں نا شہر آباد سی، تانکہ اُنہاں کی
 اُنہوں تھلے سٹن۔³⁰ پر او لوکاں نے درمیان وچوں ٹری گئے۔

حضرت عیسیٰ اک بندے وچوں جن کڈئے ان

³¹ اِس تُوں بعد حضرت عیسیٰ ریاست گلیل نے شہر
 کَفَر نَحُوم ٹری گئے۔ اُتھے او ہفتے آلے مبارک دیہاڑے
 تعلیم دین لگے۔³² لوکاں اُپر اُنہاں نی تعلیم نا بہوں اثر ہویا
 کیئانکہ او صاحبِ اختیار بندے نی حثیت نال بیان کرنے
 سٹن۔³³ اُتھے بنی اسرائیل نے عبادت خانے وچ اک ایئے
 جہیا بندہ سی جس وچ جن سی۔ او زورے نال چیخیا،
³⁴ ”او عیسیٰ ناصری! تُوں آساں کولوں گے لوڑنا این؟ گے
 تُوں آساں کی تباہ کرنے واسطے آیا این؟ میں تکی سیاننا
 آں تُوں کُٹ این، تُوں تے اللہ تعالیٰ نا پہیجیا وا قُدوس این!“
³⁵ پر حضرت عیسیٰ اُس جنے کی سختی نال حُکم
 دتا، ”چپ ہوئی جا! تے اِس بندے وچوں نکلی جا!“
 جنے اُس بندے کی ساریاں لوکاں نے سامٹے زیمی

اپر ٹھائی سٹیا، تے اُس وچوں نکلی گیا، پر اُس کی کوئی نقصان نی پُہنچایا۔³⁶ اے گل تکی کے سارے لوک حیران ہوئے، تے اِک ڈوئے کی آخٹ لغے، ”اے بہوں پُہنچی وی ہستی اے! اے جنات کی حُکم کرنا اے، تے او اِس نا حُکم مننے ان!“³⁷ اِس گلے تُوں حضرت عیسیٰ اُس سارے علاقے وچ مشہور ہوئی گئے۔

حضرت عیسیٰ بہوں سارے بیمار لوکاں کی شفا دینے ان

³⁸ فر حضرت عیسیٰ عبادت خانے تُوں نکلی کے حضرت شمعون نے کہار گئے۔ اُتھے شمعون نی سس صاحبہ کی سخت تاپ چڑھیا سی۔ اُنہاں حضرت عیسیٰ کی آخیا، ”مہربانی کری کے اِنہاں واسطے کُجھ کرو۔“
³⁹ حضرت عیسیٰ اُس مائی کول گئے، تے تاپے کی حُکم دتا۔ تاپ اُسے ویلے لہئی گیا، تے مائی اُسے ویلے اُٹھی کے اُنہاں لوکاں نی خدمت خاطر کرن لغی۔

40 نماشاں ویلے لوکاں اپٹے گہراں وچوں ہر قسم نے
مریض حضرت عیسیٰ کول ہٹی آندے، تے اُنہاں
ہر مریض اپر اپنا ہتھ مُبارک رخی کے شفا دتی۔

41 اُنہاں بہوں سارے لوکاں وچوں جنات وی گڈھے۔
او نکلٹے ویلے چِیخی چِیخی کے آخٹے سن، ”توں
اللہ تعالیٰ نا پتر این!“ پر حضرت عیسیٰ اُنہاں کی
ڈکی شوڑیا تے فر او چُپ ہوئی گئے، کیئانکہ اُنہاں
کی پتہ سی کہ او اللہ تعالیٰ نے پہیجے وے مسیح اُن۔

42 اگلے دیہاڑے صبح سویرے حضرت عیسیٰ اُتھوں
نِکلی کے اک ویران جغہ وچ ٹری گئے۔ بہوں سارے
لوک اُنہاں کی لوڑٹے رہے، تے آخرکار او اُنہاں کی لبھی
گئے۔ لوکاں حضرت عیسیٰ کی روکٹے نی بہوں کوشش
کیتی تانکہ اُنہاں کی چھوڑی کے گدرے ناں جاں۔

43 پر حضرت عیسیٰ اُنہاں کی آخیا، ”ڈوئے گرانواں تے
شہراں وچ جانی کے اللہ تعالیٰ نی بادشاہی نے بارے

40.4 شریعت نے مطابق او لوک ہفتے نی شام تک کوئی کم نی کری
سکٹے سن اس واسطے او نماشاں ویلے آئے سن۔

وچ خوشی نی خبر سُٹا وی ضروری آے، کیئانکہ
اسے مقصد واسطے اللہ تعالیٰ مکی پہنچیا اے۔“ 44 اس
واسطے او سارے ملخے وچ جائی کے اللہ تعالیٰ نا پیغام
بنی اسرائیل نے ساریاں عبادت خانیاں وچ سُٹائے رہے۔

نور-ے-کشمیر



اللہ تعالیٰ اپنا فضل ترے امن پاک نبیاں نے ذریعے انسانیت پر ظاہر
کیتا۔ اسان نا دلی مقصد اے کہ اس پیغام کی پھیلا یا جائے۔
اسان خوشی نال عیسیٰ المسیح نے بارے وچ تسان نال گل
کرساں، یا تسان نال دُعا کرساں، یا تسان نی مدد کرساں۔



<https://m.me/noor3kashmir> WhatsApp +447726104324 <https://noorekashmir.com>